

Esperansa foun ba dinamika foun iha PN

Author: Guteriano Neves, 6 Setembru 2017

Parlamentu Nasional hahuu ona sesaun ba dahuluk ba lejislatura dala hat nian, no hili ona Prezidenti Parlamentu foun. Iha kontextu politika no ekonomia Timor nian agora, iha ne'ebe presiza atu mantein governu koligasaun, atu haforsa fali konfiansa publiku ba instituisaun demokratiku sira; partikularmente ba Parlamentu Nasional, no hatan ba ezizensia publiku nian ba efikasia prestasaun servisu publiku nian; papel Parlamentu sai kritiku tebes iha tinan liima oin mai.

Eleisaun ba ba Prezidenti Parlamentu horikalan sai hanesan teste dahuluk ba dinamika iha Parlamentu Nasional, no mos estabilidade koligasaun ne'ebe sei forma Governu. Votasaun ida ne'e fo impresaan balu katak ita sei haree dinamika foun iha Parlamentu Nasional. Se dinamika ida agora ne'e mantein, ho CNRT no PLP sai hanesan koligasaun, ida ne'e sei hamosu Parlamentu ida ne'ebe dinamiku no forsa atu hala'o nia knaar.

Teste dahuluk ba eleisaun ida ne'e liu ona hodi hili Dr. Aniceto Guterres nuudar Prezidenti Parlamentu iha tinan lima oin mai. Dr. Aniceto rasik la'os oin foun ba publiku Timor. Mai hosi background ativizmu direitus umanus no libertasaun nasional, asumi kargu importantte lubuk ida hanesan Komisariu ba Comissaun Acolhamentu Verdade e Rekonsiliaun, no tuir fali hanesan Komisariu ba Comissaun Verdade no Amizade, Dr. Aniceto, iha peijo tomak atu fasilita renova fali konfiansa publiku ba Parlamentu. Ida ne'e tau konsiderasaun katak Parlamentu nuudar orgaun colegial ida.

Haree hosi parte politiku, papel importante ba Parlamentu iha tinan lima oin mai mak oinsa atu mantein estabilidade governativa, iha tempu hanesan labele lakon ninia mandatu konstitusional hanesan fiskalizador. Kestaun rua ne'e dala barak iha komprensaun sala; no trata hanesan buat rua ne'ebe tenki hili ka ema bolu trade-off.

Hosi aspeitu estabilidade governativa, Parlamentu sei sai fatin atu halo negosiasaun politika no mos konsensus politika, atu fo estabilidade ba Governu. Ida ne'e importante iha kontextu ida ne'ebe Governu mai hosi koligasaun partidu sira.

Maibe ida ne'e labele hamos ou sai razaun atu lori halakon papel seluk Parlamentu

nian hanesan fiskalizador ba programa Governu nian. Politika saida deit mak sai hosi GOvernu nia kualidade sei diak liu wainhira liu hosi prosesu diskusaun ida ne'ebe klean iha instituisaun politika ne'e rasik.

Relasiona ho papel fiskalizador ida ne'e, kestaun ida ne'ebe sai atensaun durante tinan lima ikus ne, mak laiha opozisaun iha Parlamentu. Kestaun termus saida deit mak atu uza, de faktu katak ita presiza duni opozisaun ida ne'ebe forte no konstrutivu iha Parlamentu atu halo exame ba programa governu nian.

Iha kontextu ida agora, se laiha mudansa signifkativu, CNRT ho PLP rasik bele hamosu ona ida ne'e. CNRT rasik kompostu hosi ema sira ne'ebe iha experiensia tinan naruk iha ezekutivu no mos balu iha Parlamentu rasik. Sira nia esperiensia sei sai kapital importante atu kontribui ba iha debate no diskusaun iha Parlamentu; inklui atu fiskaliza ezekutivu.

PLP rasik mai ho forsa politika ida ne'ebe hakarak atu iha mudansa, no iha kompromisu ida atu toma papel ida ne'ebe konstrutivu no edukativu. "Konstrutivu no Edukativu" iha ne'e bele hamosu interpretasaun oioin. Deputadu PLP nian rasik barak mak oin foun iha politika partidaria. Kestaun mak oinsa materializa idealizmu no valor hirak ne'e iha kontextu politika partidaria iha sosie ida ne'ebe kontinua ho fragmentasaun.

Ho forsa rua ne'e hamutuk iha opozisaun, signifika katak ita sei iha dinamika foun ne'ebe interesante iha Parlamentu Nasional ba tinan lima oin mai. Parlamentu sei sai nuudar instituisaun ida ne'be sai fatin ba negosiasaun politik, fatin atu hetan konsesus, fatin atu mantein estabildade governativa, mos instituisaun ida ne'ebe halao nia knaar lori fiskaliza programa Governu nian.

Kestaun hirak ne'e importante iha kontextu ida agora; wainhira konfiansa publiku ba ita nia instituisaun demokratiku sira komesa mihis ba bebeik; rezulta hosi dinamika durante tinan 15 nia laran.

Durante ne'e, iha persepsaun katak Parlamentu la halao nia knaar nuudar fiskalizador ba programa Governu, rezultadi hosi politika konsensus durante tinan lima nia laran. Maski iha parte ida, politiku sira koko defende ne ho razaun stabilidade, maibe iha parte seluk; ema kestiona mandatu konstitusional Parlamentu nian.

Kestaun seluk mak kualidade de diskusaun iha Parlamentu, no kualidade no produtividade Parlamentu nian rasik mos sai hanesan asuntu ida ne'ebe ema barak kestiona. Ida ne'e haree ba kuantidade da lei, no mos kualidade hosi lei hirak ne'ebe

Parlamentu produz. Durante tinan lima nia laran mos, Parlamentu produz rezolusaun lubuk ida ne'ebe kategoriza hanesan kontroversial. Desizaun balu mos hamosu tan naha todan em termus de kustu ba administrasaun publiku.

Prezidenti PN rasik iha ninia diskursu depois de eleisaun, halo kompromisu lubuk ida ona atu hatan ba kestaun hirak ne'e. No haree didiak konteudu hosi diskursu ne'e, iha kompromisu lubuk ida ne'ebe halo atu lori hatan ba kestaun hirak ne'e.

Observa negosiasaun politika hirak ne'ebe lao agora, no kompozisaun iha Parlamentu agora nian, iha razaun atu hateten katak iha esperansa foun ba dinamika foun ba uma fukun ida ne'e. Dinamika ida ne'ebe bele hamosu fali konfiansa publiku ba fatin ida ne'ebe tuir lolos tenki sai sentru ba teatru politiku ita nian, no fatin ida ne'ebe kontinua atu mantein valor demokratiku iha sosiedade laran.